

# Akilerartarnermi ukiumoortumik naatsorsuutinut ilalu ilanngullugit piumasaqaatit pillugit Namminersorlutik Oqartussat nalunaarutaat

Akileraaruserinermik ingerlatsineq pillugu Inatsisartut inatsisaanni nr. 11, 2. november 2006-imeersumi § 17, imm. 1 aamma 2, § 18, imm. 1 aamma 2, § 18 a aamma § 83 naapertorlugit aalajangersarneqarput:

## Atuuffi

**§ 1.** Nalunaarummi matumani malittarisassat inuussutissarsiutinik ingerlatsisut suliffeqarfinut aammalu inuussutissarsiuteqartuni ingerlatseqataasunut soqutigisaqartunut, kommanditselskabini peqataanermigut inuttut akisussaasuusunut, kommanditselskabini peqataasunut killilimmik akisussaaffeqartunut imaluunniit umiarsuaatileqatigiiffinni ingerlatseqataasunut § 6-imi taaneqartunut, aningaasarsianit akilerarutit pillugit Inatsisartut inatsisaanni § 1 imaluunniit § 2 naapertorlugit akilerartussaataasunut, atuupput.

**§ 2.** Akileraaruseriffik akilerartussaataasunut ataasiakkaanut eqimattakkuutaanulluunniit tamakkiisumik ilaannakortumilluunniit nalunaarummi matumani §§7 - 23-mi maleruagassat saneqqunniissaannut immikkut akuersissuteqarsinnaavoq.

## *Suliffeqarfinnut mikisunut naatsorsuutinut ilassutaasumik paasissutissat*

**§ 3.** Inuinnaat inuussutissarsiummik ingerlataqartut, ukiuni naatsorsuuseriffiusuni marlunni tulleriinni ukiumut 1.000.000 koruunit sinnernagit kaaviiartaqartut, naatsorsuutini inissiinerit pingaarnerit saqqummiutissavaat.

*Imm. 2.* Akileraaruseriffiup naatsorsuutini inissiinerit pingaarnerit pillugit nalunaaruteqarnissamut allattuiffissatut atugassat sanassavai.

*Imm. 3.* Naatsorsuutini inissiinerit pingaarnerit pillugit paasissutissiissutit nammineerluni nalunaarummut ilanngullugit nassiunneqassapput.

*Imm. 4.* Imm. 1-3-imi aalajangersagaq inuussutissarsiuteqartuni ingerlatseqataasunut soqutigisaqartunut, kommanditselskabini peqataanermigut inuttut akisussaasuusunut, kommanditselskabini peqataasunut killilimmik akisussaaffeqartunut imaluunniit umiarsuaatileqatigiiffinni ingerlatseqataasunut, akilerartarnermi ukiumoortumik naatsorsuusiornermik naammassinninnissamut aalajangersakkanik soqutigisaqaqatigiit ingerlatseqatigiiffiannut, kommanditselskabimut imaluunniit umiarsuaatileqatigiiffimmut ingerlatseqataasumut isumaginnitsitsisunut, atuutinngilaq, takuuk § 6.

## *Akilerartarnermi ukiumoortumik naatsorsuutinik tunniussineq*

**§ 4.** Akileraaruseriffiup nammineerluni nalunaarsuineriut tunngavissanik nakkutilliineranut atugassanik, nammineerluni nalunaarsuineriut tunniussinissamut piffissaliunneqartup qaangiutinnginnerani, akilerartarnermi naatsorsuutinut piffissaliussamut naammassineqarsimasumut kingullermut

ukiumoortumik naatsorsuutini akileraaruseriffimmut tunniussisoqassaaq, taamaattoq takuuk § 5.

*Imm. 2.* Akileraartarnermi ukiumoortumik naatsorsuutit ukiumoortumillu nalunaarusiaq akileraaruseriffiup atugassatut aalajangersagaanut aammalu qanoq isikkoqarnissaanik aalajangigai naapertorlugit digitalinngorlugit suliaralugit tunniunneqarsinnaapput.

§ 5. Illuutini marluk tikillugit attartortitsiviusumik inuussutissarsiutigalugu ingerlatsivik inuinnarnit ingerlanneqartuuppat, § 4 apeqquataatinngu akileraartarnermi ukiumoortumik naatsorsuutini tunniussisoqassanngilaq.

*Soqutigisaqartunut, kommanditselskabini peqataanermigut inuttut akisussaasuusunut, kommanditselskabini peqataasut killilimmik akisussaaffeqartunut aamma umiarsuaatileqatigiiffinni ingerlatseqataasunut akileraarutitigut ukiumoortumik naatsorsuutit*

§ 6. Soqutigisaqartut, kommanditselskabini peqataanermigut inuttut akisussaasuusut, kommanditselskabini peqataasut killilimmik akisussaaffeqartut aamma umiarsuaatileqatigiiffinni ingerlatseqataasut (peqataasut) akileraartarnermi ukiumoortumik naatsorsuutit pillugit §§ 7-23-mi aalajangersakkat, soqutigisaqatigiit ingerlatseqatigiiffiata, kommanditselskabip imaluunniit umiarsuaatileqatigiiffiup ingerlatseqataasup naammassissagai, toqqarsinnaavaat, taakkualu tamatuma kingorna ukiumoortumik naatsorsuutit naqqiutitaqartut aamma sukumiisumik nassuiaatitaqartut peqataasunut, taakkua isertitaminnik naatsorsuinerannut atugassanngorlugit, tunniutissavaat.

*Imm. 2.* Peqataasut isertitanik akileraaruteqaataasussanik naatsorsuinerminni soqutigisaqatigiit ingerlatseqatigiiffianit, kommanditselskabimit imaluunniit umiarsuaatileqatigiiffiup ingerlatseqataasumit isertitatik sukumiisumik nassuiaasiussavaat.

*Imm. 3.* Peqataasut akileraartarnermi piffissanut agguataarineq imaluunniit nalilinnik naatsorsueriaaseq atorunikku imaluunniit akileraartarnermi nalikilliliisimagunik, imm. 1-mi taaneqartut ukiumoortumik naatsorsuutini allaanerusunik, naqqiinerit tamarmik immikkoortillugit allattorneqassapput.

*Akileraartarnermi ukiumoortumik naatsorsuutini piumasaqaatit nalinginnaasut*

§ 7. Akileraartarnermi ukiumoortumik naatsorsuutit, takuuk §§ 10-23:

- 1) akileraaruserinermi tunngaviusut malillugit suliarineqarsimassapput, imaluunniit
- 2) akileraarutitigut naqqiutini (allanngortitsinerit) aammalu ukiumoortumik naatsorsuutini sukumiisumik nassuiaatinik imaqqassallutik.

*Imm. 2.* Akileraartarnermi ukiumoortumik naatsorsuutit paasissutissartaqartut, takuuk § 8, imm. 1, ersarissumik paasiuminartumillu akileraaruseriffiup nakkutiginninneranut tunngavissiisinaassapput.

*Imm. 3.* Akileraartarnermi ukiumoortumik naatsorsuutini nuussineq, ukiup siuliani akileraarutitigut naatsorsuinerit ataqatigiinnera paasineqarsinnaanngorlugu, suliarineqassaaq.

*Imm. 4.* Akileraartarnermi ukiumoortumik naatsorsuutini ilaatinneqassapput angusanut naatsorsuineq, oqimaqatigiissitsineq aamma suliffeqarfiup nammineq aningaasaataanni nikerarnerit sukumiisumik nassuiaataat.

§ 8. Akileraartarnermi ukiumoortumik naatsorsuutit kiisalu paasissutissat akileraartarnermi ukiumoortumik naatsorsuutini tunngavissani ilaatinneqartut, naatsorsuutini allattukkani imaluunniit tassunga atasumik sukumiisumik nassuiaatini takuneqarsinnaassapput.

*Imm. 2.* Nalunaarsukkat tamarmik akileraarutitigut naatsorsuinerit malinnaaffigineqarsinnaanngorlugit, naatsorsuutini allattuineq aqqissuunneqassaaq. Akileraarutitigut naatsorsuinerit, katiterneqarfigisaminnit avissaartinneqarsinnaassapput.

**§ 9.** Paasissutissat § 8, imm. 2-mi taaneqartut, ukiup naatsorsuuseriffiusup naanerani ukiuni 5-ini toqqortarineqassapput.

*Imm. 2.* Taamaattoq imm. 1-mi aalajangersagaq nioqqutissanik pisiniarfinni suliffeqarfiup karsianit pappialanut allagartanut aammalu ilanngussanut suliffiup iluani atorneqartunut taamaaqataannut atuutinngilaq, taakkua ukiumoortumik naatsorsuutit atsiorneqareernerannit ukiumi 1-mi toqqortarineqartussaallutik.

**§ 10.** Ilanngaaseereermermi kaaviiartitat nioqqutissanik sullissinernillu ukiup naatsorsuuseriffiusup aallartinnerani naanerani pisassarisat naatsorsuutugalugit naatsorsorneqassapput.

*Imm. 2.* Ilanngaaseereermermi kaaviiartitat immikkut paasissutissiissutigineqassapput. Allap akiligassaanik suliamik ingerlatamut naligititaq, § 13 naapertorlugu kaaviiartitani ilanngaasikkani iluarsiiffineqarpat, iluarsiineq immikkut ersersinneqassaaq.

**§ 11.** Aningaasartuutit, ilanngullugit nioqqutissanik atuineq, aningaasarsiat allallu sulisorisanut aningaasartuutit suuneri malillugit immikkut paasissutissiissutigineqassapput.

*Imm. 2.* Aningaasartuutit sanaartornermik siunertaqartunut atorneqarsimappata, tassunga nuussineq immikkut paasissutissiissutigineqassaaq.

**§ 12.** Nioqqutissat uninngasuutigineqartut immikkut paasissutissiissutigineqassapput.

*Imm. 2.* Ukiup naatsorsuuseriffiusup naanerani nioqqutissat uninngasuutit ataasiakkaarlugit kisinneqassapput, annertussusaat kisitsinermermi allattuiffimmi uppersarsarneqarsinnaassalluni, tassani nioqqutissat ataasiakkaat allassimassallutik aammalu pisariaqarpat suussusersineqarsinnaassallutik.

*Imm. 3.* Peqqumaasivimmiititat isumannaatsumik uninngasuutitut naatsorsuutit assigisaallunniit tunngavilugit qaqugukkullunniit naatsorsorneqarsinnaappata, kisitsineq ukiup naatsorsuuseriffiusup naanerinngisaraluani pisinnaavoq.

*Imm. 4.* Nioqqutissanik uninngasuutit nalinginik naatsorsuinermermi tunineqarsinnaanngitsut nalinginik ilanngaasoqarsimappat, imaluunniit allat akiligassaannik suliat ingerlasut nalingisa naatsorsorneranni toqqaannartuunngitsumik tunisassiornermermi aningaasartuutit, imaluunniit iluanaarutaasussap ilaa, ilanngunneqarsimappata, aningaasat taakkua immikkut paasissutissiissutigineqassapput.

**§ 13.** Suliffeqarfiup kajumissarneqarnermermi, suliat ingerlasut allanit akilerneqartussat, suliassiissutitut ataasiakkaanut agguataarlugit, kiisalu naliliineq qanoq ingerlanneqarsimanersaq, nassuiarsinnaasariaqarpaa.

**§ 14.** Makkua immikkut paasissutissiissutigineqassapput:

- 1) Ukiup naatsorsuuseriffiusup naanerani pisassarisat akiitsullu nioqqutissanut sullissinernullu tunngasut.
- 2) Pisassarisat akiitsullu illuutini qularnaveeqqusiinermermi qularnaarneqarsimasut pisassaqtut akiligassaqtut taallugit qularnaveeqqummullu takunnissinnaanissamut pisariaqartunik paasissutissiissutit.
- 3) Aningaaserivinnut assigisaannullunniit aallarniutissatut akiliutit, akileraaruseriffimmut paasissutissat nalunaarutigineqarsimanngippata, inissiiviup sumiiffia kontollu normua allallugit.
- 4) Pappiaqqat nalillit, nalit allanngorarnerisigut iluanaarutit annaasaqaatillunniit akileraaruteqaataasussaasut, pissarsiarineranni akia, nalinga allassimasoq naligititaasullu allallugit. Pappiaqqat nalillit toqqorsivimmiippata, paasissutissat akileraaruseriffimmut nalunaarutigineqarsimanngippata, toqqorsivik aamma taaneqassaaq. Pappiaqqanut nalilinnut erniaqartitaasunut, aallaqqaammut aningaasat amerlassusii imaluunniit akiitsut sinneri danskit aningaasaannut iluarsineqarsimasut, pilersinneqarneranni erniaritinneqartut allanneqassapput.

5) Pisassarisat allat imaluunniit akiitsut allat.

*Imm. 2.* Akiitsoqartunit paasineqartunik annaasaqaatinik ilimagineqartunilluunniit annaasaqaatigissanganik nalikilliliissutit immikkut allanneqassapput.

**§ 15.** Pigisat akileraarutitigut nalikilliliivigineqarsinnaasut, nalikilliliinermut tunngavigisat nakkutiginnissaannut atugassanik immikkoortitaarlugit naatsorsuiffigineqassapput pisariaqartunik nalikilliliinerillu naatsorsorneqarnerannut paasissutissiilluni.

*Imm. 2.* Illuutitut aalaakkaasunut, umiarsuarnut timmisartunullu akileraarutitigut nalikilliliinernut aamma pigisamik piffissap piginnittuuffigisap tamakkiisup nalaani nalikilliliinerit nalunaarutigineqarlutik nassuiaatissiineqassaaq.

**§ 16.** Suliffeqarfik Kalaallit Nunaata avataani pigisaqarpat, tamanna immikkut nalunaarutigineqassaaq:

1) pigisap pissarsiarineranut akia 25.000 koruunit sinnersimappagit, aamma

2) paasissutissaq taanna suliffeqarfup ukiumoortumik naatsorsuutaanni ersinngippat.

*Imm. 2.* Arlaqartunik pigisaqartoqarpat, pigisat suuneri naapertorlugit paasissutissiissutit immikkoortinneqassapput.

**§ 17.** Namminerisanik aningaasaatit naatsorsorneranni nioqqutissanik nammineq atuineq aningaasartuutunullu peqataanerit il. il. immikkut takutinneqassapput.

**§ 18.** Aningaasartuutit isertitallu allattukkat akornanni imaluunniit pigisat akiligassallu akornanni pisassanik imaluunniit akiligassanik ilanngussisoqarsimappat, ilanngaasiinnginnermi kisitsisit takutinneqassapput.

**§ 19.** Makkua immikkut allanneqassapput:

1) Ilassinninnermut aningaasartuutit.

2) Angalanernut ilaalu ilanngullugit ajunngitsorsiat akileraaruteqaataasussaangitsut.

**§ 20.** Isertitat aningaasartuutillu, nalinginnaasumik ingerlatsinermi allaanerusuneersut, nalunaarsukkat immikkut ittut takutinneqassapput aammalu pingaaruteqanngitsumik sunniuteqartussaasimannngippata, taakkua suuneri malillugit sukumiisumik allattorneqassallutik. Taamaattoq taamatut agguaanissaq aningaasaqarnermut suliffeqarfinnut atuutinngilaq.

*Paasissutissat akileraaruseriffimmut nalunaarutigineqartut naligiissaarneqarnerat*

**§ 21.** Nalunaaruteqartussaataitaasut immikkut aningaasarsiat aamma akissarsiat ilaalu ilanngullugit, ukiumoortumik naatsorsuutini ilaasut paasissutissiissutigissavaat, aammalu akileraaruserinermik ingerlatsineq pillugu Inatsisartut inatsisaanni § 30, imm. 1 aamma 3, aamma § 30 a malillugit aningaasarsianut akissarsianullu ilaalu ilanngullugit akileraaruseriffimmut nalunaarutigineqarsimasunut naligiissaarineq takutissallugu, takuuk aningaasarsianit akileraarutit pillugit paasissutissanik akileraaruseriffimmut nalunaaruteqartarneq pillugu nalunaarut.

**§ 22.** Ernianik nalunaarutiginnittussaataitaasut kaammattorneqarnermikkut ernianit isertitat aamma ernianut aningaasartuutit, ukiumoortumik naatsorsuutini ilaasut, paasissutissiissutigissavaat, aammalu aningaasarsianit akileraarutit pillugit paasissutissanik akileraaruseriffimmut nalunaaruteqartarneq pillugu nalunaarummi maleruagassat malillugit ernianut akileraaruseriffimmut nalunaarutigineqarsimasunut naligiissassallugit.

**§ 23.** § 21-imi aamma § 22-mi taaneqartutut nalunaarutiginnittussaataitaasup ukioq naatsorsuusiorfusoq qaammatsiutit malillugit ukiumit allaanerusoq atorsimaguniuk, aningaasartat nalunaarutigineqartut qaammatsiutit malillugit ukiup ilaanut naatsorsuusiorfusumut qanoq agguarsimanersut, immikkut paasissutissiissutigissavaa.

*Akiligassiissutitut il. il. piumasaqaatit minnerpaaffissaat*

§ 24. Tunisanut ataasiakkaanut tamanut tuniniaasooq akiligassiisummik tunniussisassaaq, pisisooq suliffeqarfik inuussutissarsiornermik ingerlataqartoq allaanersooq imaluunniit inuinnaanersooq apeqqutaatinnagu, taamaattoq takuuk § 25.

*Imm. 2. Akiligassiissutit makkuninnga atuaruminartunik imaqassaaq:*

- 1) Akiligassiissutit tunniunneqarneranut ulloq.
- 2) Tulleriinnik normulerlugit normulersuineq, paatsuugassaanngitsumik akiligassiisummik suussusersiiviususaaq.
- 3) Tunisipul nalunaarsorneqarnermini normua (CVR-nr. mv.) aamma attaveqarfissamut paasissutissat tassaasut atia, najugaa immaqalu oqarasuaatip normua aamma e-mailadresse.
- 4) Nioqqutissat imaluunniit sullissinerit tunniunneqartut annertussusaat suunerilu
- 5) Tunisinermi aningaasartai tamarmiusut.
- 6) Pisisumut attaveqarfissamut paasissutissat tassaasut atia, najugaa immaqalu oqarasuaatip normua aamma e-mailadresse.
- 7) Ulloq tunniussiviusooq, ulloq taanna akiligassiissutit tunniunneqarnerata ulluanit allaanerusimappat.

*Imm. 3. Nioqqutissanik sullissinernillu tunisinernut immikkut ittunut arlalinnut qaammatisiutit malillugit ukiup ataatsip iluani pisisumut ataatsimut ataatsimoortumik akiligassiisummik tunniussisoqarsinnaavoq.*

*Imm. 2 taamatuttaaq akiligassiisummut ataatsimoortumut atuuppoq, taamaattoq nioqqutissat imaluunniit sullissinerit annertussusaat aamma ulloq tunniussiviusooq, assersuutigalugu allagartaani malittaatinneqartumi, akiligassiisummut ataatsimoortumut ilanngullugu paarineqartumi, ilanngussap ataaniittumi takuneqarsinnaappat naammalluni.*

*Imm. 4. Paarlateqatigiilluni niuernermini, aappaa illuatungeriit tamarmik nalunaarsorneqarnermini normui akiligassiisummi allassimallutik, akiligassiisummik tunniussippat, naammappoq.*

*Paarlaasseqatigiilluni niuernerneq paasineqassaaq tassaasooq, nioqqutissanik sullissinernillu tamakkiisumik ilaannaasumilluunniit nioqqutissat imaluunniit sullissinerit allat akiliutigalugit, tunisineq.*

*Imm. 5. Akiliinermi ilanngussaaq tassaavoq akiligassiissutit, tassani pisisooq tunisisooq sinnerlugu akiligassiisummik tunniussilluni. Akiliinermi ilanngussaaq, sioqqutsisumik pisisup tunisisullu akornanni isumaqatigiissuteqartoqarsimappat imaluunniit inuussutissarsiummi ileqquusut malinneqarpata, atorineqarsinnaavoq. Imm. 2 taamaaqataanik akiliinermi ilanngussanik atuinnermut atuuppoq. Tamatuma saniatigut akiliinermi ilanngussami pisisup nalunaarsorneqarnermini normua (CVR-nr. il. il) allassimassaaq aammalu akiliinermi ilanngussaaq pineqartoq takuneqarsinnaassalluni.*

*Imm. 6. Akiliinermi ilanngussaaq pisisup tunisisullu akornanni isumaqatigiissuteqarneq tunngavigalugu tunniunneqarpat, isumaqatigiissutit taamaattoq allaganngorlugu pigineqassaaq aammalu illuatungeriit tamarmik isumaqatigiissutit pappialartaanik tigummisaqassapput. Ileqqut malinneqartut imaluunniit pilersuinnermut tunngasut pineqartillugit, nioqqutissanik tunniussinnermut akinillu aalajangersaanermut malittarisassatigut assigisaatigullu maleruagassat assigiillutik, tamanna allaganngorlugu isumaqatigiissummut sanilliunneqassaaq, akiliinermi ilanngussamik tunniussinnermut tunngavissaliisinnaassalluni.*

*Imm. 7. Akiligassiissutit aamma akiliinermi ilanngussaaq tunniunneqassaaq, nioqqutissaaq imaluunniit sullissineq tunniunneqareerpat imaluunniit tamatuma kingorna piaartumik. Akiligassiineq inuussutissarsiummi ileqqorineqartunit nalinginnaasunit kingusinnerusukkut pissanngilaq.*

*Imm. 8. Akiligassiissutit allannortinneqarnera kreditnotamik tunniussinikkut pissaaq, tassani*

immikkuullarissumik paatsuugassaanngitsumillu akiligassiissutaaqqaartoq allanngortinneqassalluni.

Akiligassiissutip tunniunneqareernerani nioqqutissanik utertitsisoqarpas imaluunniit nioqqutissap imaluunniit sullissinerup akikillineqarnerani, kreditnota tunniunneqassaaq. Imm. 2 kreditnotanut taamaaqataanik atuuppoq. Tamatuma saniatigut kreditnota, ulloq tunniunneqarfia aamma normua allallugit, akiligassiissutaaqqaartumut akiligassiissutigineqartunulluunniit innersuussinermik imaqaassaaq.

*Imm. 9.* Akiligassiissutit, kreditnotat aamma akiliinermi ilanngussat marlunngorlugit tunniunneqassapput, aappaa pisisumut tunniunneqassalluni aappaalu tunisisumiissalluni. Akiligassiissutit, kreditnotat akiliinermilu uppersarsaatit qarasaasiakkut isumagineqarlutillu qarasaasiami toqqortaatigineqarsinnaapput.

§ 25. Tunisisup § 24, imm. 1-imi aamma 2-mi piumasaqaatit saneqqussinnaavai, ilaatinneqanngitsut makkua arlaat atuussimappat:

1) Inuussutissarsiornermi ileqqusut malillugit allatut normulersuinermik atuisoqarpas, assersuutigalugu atuisut normui imaluunniit attartortut normui, akiligassiissutit tulleriinnik normulersorneqarnissaat pillugu § 24, imm. 2, nr. 2-mi piumasaqaat malinnginneqarsinnaavoq. Attartornermik isumaqatigiissut, § 24, imm. 2 naapertorlugu ilusiliussanik naammassinnittoq, akiligassiisaqattaarnermut taarsiullugu atorineqarsinnaavoq.

2) Tunisisoq, atuisartunut inuinnartut taamaallaat imaluunniit annertunerpaatigut tunisisarpat, tunisanik nalunaarsueriaatsimik atuisinnaavoq, assersuutigalugu kasseapparat, aammalu karsimit allagartaq paasissutissanik § 24, imm. 2-mi taaneqartunik imaqartoq tunniullugu, ilaanatik paasissutissat nr. 2, nr. 6-imi aamma nr. 7-imi aalajangersakkamiittut. Karsip allagartaani tunisisup atia imaluunniit nalunaarsorneqarnermini normua allassimassasoq, tunisisup aamma toqqarsinnaavaa.

3) Nr. 2-mi taaneqartutut paasissutissanik imalimmik karsip allagartaanik tunniussinissaq teknikkikkut ajornartillugu, atuisartunut inuinnarnut tunisisup tamatumunnga taarsiullugu karsip allagartaa nalinginnaasoq makkuninnga paasissutissartaqartoq tunniussinnaavaa: ulloq, tunisisup atia imaluunniit nalunaarsorneqarnermini normua aamma tunisinermi aningaasartaasa annertussusaat.

4) Atuisartunut inuinnarnut tunisinermi tunisinermi nalunaarsueriaatsimik atuisoqanngippat, assersuutigalugu kasseapparat, aammalu tunisineq 1.000 kr. inorlugu aningaasartaqarpas, tamatumunnga taarsiullugu tunisisoq atuaruminartumik assaannarnik allatamik allagartamik tunniussisinnaavoq, makkuninnga paasissutissartaqartumik: ulloq, normulersuineq, tunisisup atia aamma nalunaarsorneqarnerani normua aamma tunisinermi aningaasartaasa annertussusaat. § 24, imm. 1 naapertorlugu, pisisup akiligassiisummik piumasaqarnerani, tunisinermi aningaasartaasa annertussusaat apeqqutaatinngu, tamatigut akiligassiisummik tunniussisoqartartussaavoq.

§ 26. Isertitat akileraaruteqaataasussat naatsorsorneqarnerani pisisup, nioqqutissanik sullissinernillu suliffeqarfimmit inuussutissarsiornermik ingerlatsisumit il. il. pisineranut aningaasartuutininik, ilanngaatininninnissaanut, akiligassiisummik §§ 24-imi imaluunniit 25-imi piumasaqaatinik naammassinnittumik, tunniussisoqarsimanissaa piumasaqaataavoq.

#### *Pineqaatissiisarnernut aalajangersakkat*

§ 27. Piaaraluni imaluunniit mianersuaalliorujussuarluni, § 3, imm. 1-imik, § 4, imm. 1-imik, § 6, imm. 2-mik aamma 3-mik, § 7, imm. 1-imik aamma 3-mik, imaluunniit §§ 8-26-mik unioqqutitsisoq, Kalaallit Nunaannut pinerluttulerinermut inatsimmi maleruagassat malillugit akiliisitsinermik pineqaatissinneqarsinnaavoq.

*Imm. 2.* Inatsisartut inatsisaanni imaluunniit Inatsisartut inatsisaat malillugit peqqussutini akiligassiinissaq tunngavissillugu aalajangersaasoqarsimappat, akiligassiineq Kalaallit Nunaannut

pinerluttulerinermut inatsimmi maleruagassat malillugit pisussaatitaasumut pisinnaatitaasumullu  
pisussaaffiliunneqarsinnaavoq.

*Imm. 3. Imm. 1-2 malillugit suliasat Kalaallit Nunaanni Eqqartuussivinni siullertut suliarinnittussamut  
suliakkiissutigineqassapput.*

*Imm. 4. Akiligassiinerit, imm. 1-2 malilugit aalajangersarneqartut Nunap karsianut tutsinneqassapput.*

*Atuutilernera, ikaarsaarnermut atorunnaarsitsinermullu aalajangersakkat*

**§ 28.** Nalunaarut ulloq 1. marts 2019 atuutilerpoq.

*Imm. 2. § 3 ukioq isertitaqarfusoq 2019 aallarnerfigalugu isertitanik akileraaruteqaataasussanik  
naatsorsuinerlutik atuuppoq.*

*Imm. 3. § 26 ukioq isertitaqarfusoq 2020 aallarnerfigalugu isertitanik akileraaruteqaataasussanik  
naatsorsuinerlutik atuuppoq.*

*Imm. 4. Peqatigisaanik Namminersornerullutik Oqartussat Akileraartarnermi ukiumoortumik  
naatsorsuutitut il. il. piumasaqaatit pillugit nalunaarutaat nr. 27, 1. december 2006-imeersoq  
atorunnaarsinneqarpoq.*

*Namminersorlutik Oqartussat, ulloq 26. februar 2019*

Vittus Qujaukitsoq

/

Nikolai S. Christensen

**Namminersorlutik Oqartussat**

Imaneq 4

3900 Nuuk

E-mail: [nsninatsit@nanoq.gl](mailto:nsninatsit@nanoq.gl)

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut

